

Go tloga go Moithuti yo a nago le Dihlong go ya go Moetapele wa Baithuti: Leeto la Ntokoza Pamela Mathabathe la Kgolo le Tirelo

Go Ntokoza Pamela Mathabathe, go aloga ka tikrii ya Petšhula ya Thuto ka Dipalo, Disaense tša Tlhago le Theknolotši go swaya go fihlelela toro yeo a bego a e rata go tloga bjaneng. Gape e laetša go phethwa ga kgaolo ye e nago le khuetšo bjalo ka Motlatšamongwaledi wa Khansele ya Selete sa Baemedi ba Baithuti ya Tshwane, moo a ineetšego go emela baithuti le go ba thuša go sesa ditlhohlo tša bophelo bja yunibesithi.

Lerato la Mathabathe la go ruta le thomile e sa le yo monnyane. A tutueditšwe ke barutiši bao ba ilego ba šoma e le mehlala nakong ka moka ya go tsena ga gagwe sekolo, o ile a hlagolela pono e kwagalago bakeng sa bokamoso bja gagwe gomme a phegelela lengwalo la thuto leo le bego le tla mo dira gore a kgone go tsenya letsogo ka mo go holago maphelong a baswa.

Sepheho sa gagwe sa go ithuta ka Unisa mathomong se ile sa huetšwa ke kganyogo ya go dula kgauswi le gae ge a dutše a phegelela maikemišetšo a gagwe a thuto. Le ge go le bjalo, seo se thomilego e le kgetho e bonolo go se go ye kae se ile sa fetoga sethala sa kgolo ya motho ka noši le go hlohlomiša.

“Go ba moithuti wa inthaneteng go nneile boiketlo bja go ithuta lefelong la ka la boiketlo ka gae. Ka mo go makatšago, ga bjale ke fenya lefase ka Unisa,” a hlaloša.

Go swana le barutwana ba bantši bao ba ithutago inthaneteng, Mathabathe o ile a gahlana le mapheko tseleng. Go ithuta a le noši le go lebeletšana le dikgateletšo tša ditlhahlobo tša inthaneteng gantši go be go tliša dinako tša go se kgonthišege le dipelaelo. Go e na le go dumelela ditlhohlo tše di hlaloša boitemogelo bja gagwe, o ile a di diriša e le tutuetšo ya go thekga barutwana ba bangwe bao ba bego ba lebeletšane le mathata a swanago.

Ka go diriša maitemogelo a gagwe ka noši, o ile a akaretšwa maitekong ao a bego a nea baithuti tlhahlo, thekgo le methopo, kudukudu dinakong tša ditlhahlobo. Boikgafo bja gagwe go katlego ya baithuti ka morago e be e tla ba seka se se hlaolago sa leeto la gagwe la boetapele.

Go lekalekanya boikarabelo bja tša thuto le maikarabelo a SRC go be go nyaka gore motho a be le boitshwaro le go laola nako ka kelohloko. Mo nakong ya gagwe ka moka

bjalo ka moetapele wa baithuti, o ile a dula a lebišitše tlhokomelo go lebaka leo a ngwadišitšego ka lona yunibesithing go tloga mathomong: go hwetša lengwalo la gagwe la thuto mola a dutše a na le khuetšo ye botse go setšhaba sa baithuti.

Boetapele bja baithuti le bjona bo ile bja mo fetoša ka noši. Mathabathe yo a kilego a ba motho yo a homotšego le yo a nago le dihlolong, o ile a hwetša lentšu ka go kgatha tema ga gagwe ka go lwela tokologo ya baithuti le boemedi. Boitemogelo bo ile bja mo nea kgodišego, mabokgoni a boetapele le go ba le morero o maatla.

Mošomo wa gagwe bjalo ka moetapele wa SRC o be o hlohleletšwa kudu ke kganyogo ya go thekga baithuti go tšwa ditšhabeng tše di hlokago le tša dinagamagaeng. Ka ge a ile a lebeletšana le tše dingwe tša ditlhohlo tšeo ba bego ba lebeletšana le tšona, o ile a ikemišetša go šoma e le leporogo magareng ga barutwana le yunibesithi, a kgonthišetša gore dipelaelo tša bona di a kwewa le go rarollwa.

Ka ntle le go ba moetapele, go kopana le ditsebi, dirutegi le baetapele ba mekgatlo go ile gwa mo tutueletša go nagana kudu ka bokamoso bja gagwe. Lehono, o ruta barutiši ba baithuti, o hlahla barutwana ba dipalo ka masolo a Unisa, le go phegelela dithuto tše dingwe ka maikemišetšo a go tšwetša pele mošomo wa gagwe wa tša thuto.

Go aloga e sa dutše e le e nngwe ya dinako tšeo a ikgantšhago ka tšona leetong la gagwe. Ka ge a ile a bona baithuti ba bantši ba aloga mengwageng e fetilego, ka mehla o be a ipona a le gona tiragalong yeo.

“E be e dutše e le toro. Ga e sa le go tloga ka 2019, ke be ke fela ke bolela gore ka letšatši le lengwe ke be ke tla sepela go putla sefala seo.”

Ge a lebelela pele, Mathabathe o tšwela pele go ineela go thuto ya bophelo ka moka le tlhabollo ya setšhaba. Molaetša wa gagwe go baithuti ba bjale ke wa kgotlelelo, go kgotlelela le kholofelo.

Ge a be a kgopelwa go akaretša leeto la gagwe la Unisa, o ile a nea karabo yeo e hlalošago boitemogelo bja gagwe gabotse:

“Leeto la ka la Unisa e bile Tlhabollo ya Semelo ya 101.”

Kanegelo ya gagwe ke kgopotšo ya gore katlego ya tša thuto e mabapi le se se fetago go hwetša lengwalo la thuto; gape e mabapi le kgolo, kgotlelelo, boetapele le sebete sa go tšwela ka ntle ga lefelo la motho la boiketlo.

* E rometšwe ke Lungisani Nzuzo Mbatha, Moithutamošomo, Yuniti ya Dipoledišano
le Papatšo. SELETE SA GAUTENG